

0.46
KOOPMANS, D.K., Et haor gaot je 'r stief van overaende.

In: L.C. 5-7-1986. (Uut de pultrum van de Stellingwarven).

Et haor gaot
je 'r stief
van overende

Uut de pultrum van de Stellingwarven

'k Hebbe van alles perbeerd de oolde tv, 'n zwarte, tot bedaeren te kriegen - en mit mizels wodt er et ok niet beter op - Ik drokke op et iene nao et aandere knoppien in en reust as de balle op de gool anvliegt flikkert dat ding weer en raost nog hadder as die hiele troep in et stadion. En sels krieg ik et zwiet ervan in de hannen.

As oudvoetballer, doe wij nog achter de balle anzatten mit de klompens an kon'k ok nog wel es zo-en goeie opduvel verkopen dat ie niet meer te keren was en per ongeluk in et iene of aandere doel terechte kwam -

Begriep e goed, et gaot mij om het speulen sels - De Sport -

En daaromme muijt et mij slim dat mien tv mij dwas zit -

Veur de zoveulste maal kom ik uut de stoel overende en stuutel 'k naor die lichtbak.

Et gaf mij niks as ik mij ofvraoge wat dat ding mankeert - Et kan wezen dat ie niet op zien goeie stee staot - 'k Wus wel da'j der an denken moeten dat ie niet op en eerdstraole staot en dat ie geveulig wezen kan veur spoekerije uut de ruimte -

Nau stao'ker vlak veur - Ten einde raad za'k mar zengen - 'k Gao nog es de knoppies bij

langes en inienend is et of d'r wat over mien blote arm striekt, en ak de brille d'r bi'j opzette zie ik de haorties op mien aarm overende koemen en wiezen ze allemaol naor Mexico.

Doe bin'k weer daele zakt in mien stoel en hadde ik nijs genug om over nao te denken -

Al gauw zat ik er mit in de tieze en docht ik dat ik Japie et geval mar es veur lengen mos - Japie wus ommes alles van eerdstraolen of en en leup mit en wichelroede deur et laand om molle en rottegangen nao te gaon - Bij hom thuis leupen altied biesten rond waor et iene en aandere haperde - 'n kaele hond, ok 'n uuthaorde kaeder mit een gladde statte. Japie kreeg ze veur en nao allemaole weer in 't haor. Japie hadde ommes de papieren daarveur uut Utrecht kregen -

Mar nou inienend kregen wij et deur dat mien experiment mit de tv oons en nij pad wens, en dat naost et gedoente mit die keffers en mierkende katten de meensen ok heur profijt hemmen konnen van oonze onderzoekings, en dat we daar niet mit wachten mossen tot as en aander et ok in de gaten kriegt dat er en handeltien van te maeken is.

Mitiene hemmen we doe de gang mar inzet. De punten opsteld, van de ofwikkeling van het experiment mit as

uitgaankspunt mien ervaring veur de tv. Eest mit de aarms, de bienen, ut blote lief veur en achter. Mar et aorigste was mit de kop veurover waormit it haost votdaadelik blieken die dat et bietien haor da'k daarboven nog hadde nog hadder naor boven scheut as Mexico an de balle was -

Nou kienen we vansels wat wieder dan oons haor langte is -

Wij wollen veurkoemen dat de industrie hum der mit bemuyt en daaromme bin wij zo slim west et er op an te sturen dat de meensen heur niks laoten ansmeren mar da'j sels en stuk of wat teevees zo gaon opstellen da'j niks van Mexico hoeven te misten om et haor gruijen te laoten. En a'j dat mit wat overleg doen kuj mit minder kleren toe.

De lappieskooplui kunnen wat langer mit vekaansie en dat hoeft niet zoveule meer wast te wodden - Dus minder versmering van et milieu -

Wat de zunnbanken anbelangt, die kunnen maklik ombouwt wodden. Gao dan mar echt in de zonne zitten en dan mark ie vansels, dat alles veul aoriger wodt.

Ik bin nou al zo veer henne dat mij de haoren stief overende koemen as ik an Mexico denke.

Dirk Kerst Koopmans